

男燒衣（長本）（唐健垣唱）

【南音短板面】

【慢板】聞得妹你話死，我寢食唔安。妹你為因何事，攞到自縊懸樑。
人話你死，我尚思疑，我唔信佢講，今日果然妹死去，叫我怎不悲傷。
今後唔望，八月中秋，同把月賞，唔望端陽佳節，共你看鬥龍航。
唔望七夕佳期，看雙星渡河漢，辜負月華高照，剩我淚眼汪汪。
唔望秋晨九月，共把秋菊賞，妹你心事收埋，因何唔對我講，就算啲難題有天咁大，
我定把妹你幫忙。
妹你死耗傳來，令我魂魄喪，只為那債銀幾十兩，逼到妹你懸樑。
妹你苦命紅顏，真係無倚傍，適值我身纏雜事，困在他方。
你一定想後思前，自覺無生望，咁樣你就懸樑死去，恩情掉落水茫茫。
此後壁上琵琶，彈不响，致令淒涼心事，難永鴛鴦。
唔望再與嬌彈共唱，唔望燈前月下，共你結鸞凰。
今勾任得天上，再跌一個落嚟我都唔會再想，任你靚時，都唔似我妹，你靚得咁瀟湘。
妹你辜負我深情，如海樣，我愁有萬丈，不如請隻小舟，將水陸放，等你早登仙界，
直向慈航。

【中板】我忙解纜，出到去江濱。只見江楓漁火照住我愁人。
各物擺齊，好多果品，我願妹前來鑒領我誠心。

【乙反】我燒頁紙錢，珠淚惡忍，三杯薄酒奠妹孤魂。【地水腔】

【地水無限序】

燒到童男童女，你哋相親近，吩咐眾人使喚，要聽你嘅酌斟。
大串（音能去聲）鎖匙交你哋收緊，你哋切莫頑皮激著個主人。
疊被鋪床唔在問，薰香暖被，為佢拍蚊。
洗面梳頭，為佢把骨梳，茶湯膳食，你哋去款款奉陳。
妹你三寸金蓮，係難企穩，要與你參扶左右，切勿屈親。
我燒比你大盒胭脂和水粉，又有刨花兼軟技，重有鏡妝一個弔妹孤魂。【地水腔】

【地水無限序】

燒到芽蘭帶，與共繡花鞋。

...

...